

- प्रधानमंत्री नरेन्द्र मोदी स्वास्थ्य हलका ऊं जुड़ी संबंधी 12 हजार 850 करोड़ रुपया रा खर्च वाळी न्यारी-न्यारी परियोजनावां री सरुआत कीनी-प्रदेश मांय आठ क्रिटिकल केयर ब्लॉक्स री सरुआत ।
- प्रधानमंत्री 51 हजार ऊं बत्ता नौजवानां ने नियुक्ति पत्र सूंप्या-कह्यो-सरकार नौजवानां ने नौकरी-धंधा रा बत्ता ऊं बत्ता मौका मुहैया करावण रा सगळा जरूरी जतन कर रही है ।।
- सीकर जिला रा लक्ष्मणगढ़ मांय व्ह्या सड़क हादसा मांय 12 जणा री मौत-25 ऊं बत्ता जख्मी व्ह्या ।
- धनतेरस सागे पांच दिन रो दीवाळी रो त्यौहार आज सरु व्ह्यो-बाजार अर घर सोहवणी रोशनी ऊं सजायी ज्या ।

000

प्रधानमंत्री नरेन्द्र मोदी आज धन्वंतरि जयंती अर 9वां आयुर्वेद दिवस रे मौके स्वास्थ्य हलका ऊं जुड़ी करीब 12 हजार 850 करोड़ रुपया रा खर्च वाळी न्यारी-न्यारी परियोजनावां रो उद्घाटन कीनी अर नींव रखी । प्रधानमंत्री आयुष्मान भारत प्रधानमंत्री जन आरोग्य योजना रा तहत 70 साल अर इण ऊं बत्ती उम्र वाळां बुजुर्गा सारु स्वास्थ्य कवरेज रा सुबीता री सरुआत ई कीनी । ई योजना रा तहत 70 साल अर इण ऊं बत्ती उम्र वाळां बुजुर्गा ने अब 5 लाख रुपया रा खर्च ताई रो ईलाज मुफ्त मिलेला । कार्यक्रम मांय पीएम आयुष्मान भारत हैल्थ इन्फ्रास्ट्रक्चर मिशन रा तहत प्रदेश मांय ई 8 क्रिटिकल केयर ब्लॉक्स री वर्चुअल तरीका ऊं नींव रखी ज्यी । ई मौके प्रधानमंत्री कह्यो के केन्द्र सरकार देश रा चरित्र अर सामाजिक ताना-बाना री आत्मा 'सर्वे सन्तु निरामयः' ने आधार मानता थकां सबका साथ-सबका विकास री सोच सागे काम कर रही है । मुख्यमंत्री भजनलाल शर्मा ई कार्यक्रम ऊं भरतपुर रा आरबीएम अस्पताल सागे वीडियो कॉन्फ्रेंस रे मार्फत जुड़्या । वे कह्यो के आज देश मांय स्वास्थ्य रा हलका मांय नुवी क्रांति री सरुआत व्ही है । वे कह्यो के 70 साल अर इण ऊं बत्ती उम्र वाळां बुजुर्गा ने 5 लाख रुपया ताई रा खर्च रो ईलाज मुफ्त मिलेला, जिण ऊं वे ईलाज सारु किण ई माथे निर्भर नी रेहवेला । मुख्यमंत्री कह्यो के पीएम आयुष्मान भारत हैल्थ इन्फ्रास्ट्रक्चर मिशन रा तहत आज प्रदेश रा भरतपुर, धौलपुर, चूरू, बूंदी, चित्तौड़गढ़, सिरोही, करौली अर हनुमानगढ़ रा जिला अस्पताल अर मेडिकल कॉलेजां मांय क्रिटिकल केयर ब्लॉक बणावण रा काम री नींव रखी ज्यी । वे कह्यो के आईसीयू बिस्तर, ऑक्सीजन, वेंटीलेशन अर ऑपरेशन थियेटर समेत न्यारा-न्यारा सुबीतां वाळा अ ब्लॉक बण जावण ऊं प्रदेश मांय आपातकालीन चिकित्सा सुबीता मजबूत बणेला । वे कह्यो के राज्य सरकार ई स्वास्थ्य ऊं जुड़्या सुबीता और बेहतर बणावण बाबत काम कर रही है ।

.....

उपमुख्यमंत्री दिया कुमारी आयुष्मान भारत प्रधानमंत्री जन आरोग्य योजना रा तहत करौली मांय क्रिटिकल यूनिट री नींव रखण रा कार्यक्रम मांय सिरकत कीनी । ई मौके सांसद भजनलाल जाटव, विधायक दर्शन सिंह गुर्जर अर हंसराज मीणा ई मौजूद रह्या । चित्तौड़गढ़ रा मेडिकल कॉलेज मांय राख्यी ज्या कार्यक्रम मांय उपमुख्यमंत्री प्रेमचन्द बैरवा ई सिरकत कीनी । प्रधानमंत्री देश रा पहला अखिल भारतीय आयुर्वेद संस्थान रा दूजा चरण रो ई उद्घाटन कीनी ।

सिरोही मांय एम्स जोधपुर री स्वास्थ्य सेवावां री ड्रोन डिलीवरी सेवा रो उद्घाटन ई करी ज्यो । कार्यक्रम मांय विधायक समाराम गरासिया अर मोतीलाल कोली ई मौजूद रह्या । आज ई धन्वंतरि जयंती रे मौके प्रदेश मांय न्यारा-न्यारा कार्यक्रम राख्यी ज्या । सवाईमाधोपुर मांय आयुर्वेद विभाग री ओर ऊं आयुर्वेद रा जनक भगवान धन्वंतरि री विधि-विधान सागे पूजा-अर्चना करी ज्यी अर बेहतरीन काम करण वाळा वैद्य्यां रो मान करी ज्यो ।

000

प्रधानमंत्री नरेन्द्र मोदी कह्यो है के सरकार नौजवानां ने नौकरी-धंधा रा बत्ता ऊं बत्ता मौका मुहैया करावण सारू लगातार जतन कर रही है। वे आज न्यारा-न्यारा सरकारी महकमां अर संगठनां मांय 51 हजार ऊं बत्ता नौजवानां ने वीडियो कान्फ्रेंस रे जरिये नियुक्ति पत्र संप्या। ई मौके वे कह्यो के सरकार प्रधानमंत्री इंटर्नशिप योजना रा तहत देश री पांच सौ अगाड़ी कम्पनियां मांय नौजवानां सारू पेड इंटर्नशिप री सरुआत कीनी है। प्रधानमंत्री कह्यो के सरकार नौजवानां ने लगातार पक्की सरकारी नौकरियां दे रही है। प्रदेश मांय ई जयपुर अर जोधपुर मांय लगायी ज्या रोजगार मेळां मांय नौजवानां ने नियुक्ति पत्र दिया ज्या। जयपुर मांय केन्द्रीय मंत्री अर्जुनराम मेघवाल री मौजूदगी मांय कार्यक्रम राख्यी ज्यो। जोधपुर मांय लगायी ज्या रोजगार मेळा मांय केन्द्रीय संस्कृति अर पर्यटन मंत्री गजेंद्र सिंह शेखावत कह्यो के केंद्र सरकार नौजवानां ने नौकरियां देवण सारू सगळा जतन कर रही है अर आवता बगत मांय नौकरी धंधा रा बत्ता ऊं बत्ता मौका मुहैया कराया जावेला।

000

केन्द्रीय संस्कृति अर पर्यटन मंत्री गजेंद्र सिंह शेखावत कह्यो है के जोधपुर हवाई अड्डा माथे नुवो टर्मिनल बण जावण ऊं जोधपुर न्यारा-न्यारा शहरां सागे और बेहतर तरीका ऊं जुड़ जावेला। वे आज जोधपुर मांय खबरनवीसां सागे बातचीत कर रह्या हा। शेखावत कह्यो के ईण रो फायदो पर्यटन अर उद्योग हलकां ने मिलेला। वे बतायो के जोधपुर फ़िलहाल अहमदाबाद, हैदराबाद, चेन्नई, कोलकाता, जयपुर, मुंबई अर दिल्ली ऊं हवाई सेवा ऊं जुड़्यो है।

000

सीकर जिला मांय आज व्ह्या एक हादसा मांय बारह जणां री मौत व्हे ग्यी अर 25 ऊं बत्ता लोग जख्मी व्हे ग्या। सुजानगढ़ ऊं नवलगढ़ जा रही एक गैर-सरकारी बस रे लक्ष्मणगढ़ मांय एक पुलिया ऊं टकरा जावण रे कारण ओ हादसो व्ह्यो। हादसा रे कारण बस रा आगे रा हिस्सा ने घणो नुकसान व्ह्यो। म्हाणा सीकर खबरनवीस बतायो के हादसो व्हेता ही स्थानीय लोग बचाव रा काम सरु कर दीना।

.....
सीकर रेंज रा पुलिस महानिरीक्षक सत्येन्द्र चौधरी बतायो के मरण वाळा घणखर लोग स्थानीय रहवासी है।

.....
जख्मी व्ह्या कुछ लोगां ने जयपुर रैफर करी ज्या है जदके दूजा जख्मी लोगां रो सीकर रा अस्पताल मांय ईलाज चाल रह्यो है। मुख्यमंत्री भजनलाल शर्मा ई हादसा रे कारण मरण वाळां रा पिरवार वाळां रे प्रति दुख जताता थकां जख्मी लोगां रे बेगा ई ठीक व्हेवण री कामना कीनी है। वे अहलकारां ने जख्मी लोगां रो ईलाज तैय कारण बाबत हुकम दीना है।

000

लौह पुरुष सरदार वल्लभ भाई पटेल री जयंती रे मौके मनाया जावण वाळा राष्ट्रीय एकता दिवस रा सिलसिला मांय राज्य मांय आज 'रन फॉर यूनिटी' राख्यी ज्यी। मुख्यमंत्री भजनलाल शर्मा जयपुर मांय अमर जवान ज्योति ऊं 'रन फॉर यूनिटी-एक भारत, श्रेष्ठ भारत' मैराथन दौड़ ने हरी झण्डी बता र रवाना कीनी। ई मौके मौजूद लोगां ने वे राष्ट्रीय एकता दिवस री शपथ दिरायी। मुख्यमंत्री कह्यो के आजादी पाछे सरदार पटेल कानी ऊं मजबूती ऊं करी ज्यो देश रो एको नुवी पीढ़ी ने सीख देवे है। ई मौके खेल मंत्री कर्नल राज्यवर्धन राठौड़ कह्यो के 'रन फॉर यूनिटी' फिट इंडिया रो संदेश देवे है। प्रदेश रा न्यारा-न्यारा जिला मांय ई एकता दौड़ राख्यी ज्यी। झालावाड़ मांय गढ़ परिसर ऊं अतिरिक्त जिला कलेक्टर री अगुवाई मांय रन फोर यूनिटी दौड़ राख्यी ज्यी। ब्यावर मांय जिला प्रशासन अर पुलिस री ओर ऊं कलेक्ट्रेट परिसर ऊं चांद गेट ताई रैली निकाळी ज्यी। जयपुर मांय जिला कलेक्ट्रेट रा पार्क मांय शपथ रो कार्यक्रम राख्यी ज्यो। पुलिस महानिदेशक उत्कल रंजन साहू पुलिस मुख्यालय मांय पुलिस रा अहलकारां अर कर्मचारियां ने देश रा एका, अखंडता अर हिफाजत री शपथ दिरायी।

भीलवाड़ा मांय जिला कलेक्टर रा दफ्तर मांय देश रा एका सारू प्रतिबद्धता जतायी ज्यी। जालोर मांय हनुमानशाला स्कूल ऊं शाह पूजाजी गेनाजी स्टेडियम ताई रन फॉर यूनिटी दौड़ राख्यी ज्यी।

000

दीवाळी रो पांच दिन रो त्यौहार आज धनतेरस सागे सरु व्ह्यो। धनतेरस रे मौके आज सिरोही, पाली अर हनुमानगढ़ समेत न्यारी-न्यारी ठौड़ां बाजारां मांय खूब रौनक निजर आयी। लोग मोटी तादाद मांय बर्तन, गहणा, कपड़ा अर इलेक्ट्रॉनिक सामान री खरीदी कीनी। झालावाड़ मांय एक समाज सेवी संस्था री ओर ऊं गरीब अर जरूरतमंद बच्चां ने सिल्या-सिलाया कपड़ा दिया ज्या। काल छोटी दीवाळी मनाई जावेला। इण

ने नरक चौदस या रूप चौदस ई कही जावे है। 31 अक्टूबर ने दीवाळी मनाई जावेला। दीवाळी पाछे गोवर्धन पूजा, अन्नकूट अर भाईदूज मनाया जावेला। टोंक मांय आवता तीन दिन दीपावली महोत्सव रा तैत खास कार्यक्रम राख्या जावेला। 30 अक्टूबर ने गांधी पार्क माथे भजन संध्या अर व्यास चौराहा माथे अलगोजा बजावण रो कार्यक्रम राख्यो जावेला। 31 अक्टूबर ने गांधी पार्क माथे अलगोजा बजावण अर व्यास सर्किल माथे मशक बाजा रो कार्यक्रम राख्यो जावेला। एक नवंबर ने सुभाष सर्किल माथे भजन संध्या राख्यी जावेला अर 21 हजार दीया जळाया जावेला। प्रधानमंत्री नरेंद्र मोदी धनतेरस अर आयुर्वेद दिवस रे मौके जनता ने शुभकामनावां दीनी है। सोशल मीडिया पोस्ट रे जरिये प्रधानमंत्री भगवान धन्वंतरि रा आशीर्वाद ऊं सगळा री स्वस्थ, खुशहाल अर समृद्ध जिन्दगी री कामना कीनी। आयुर्वेद दिवस रे मौके वे कह्यो के स्वस्थ जीवनशैली सारू आयुर्वेद हमेशा उपयोगी रहेवेला।